

AUGLÝSING

um samninga og yfirlýsingar Íslands, er varða vegabréfsáritanir fyrir ferðamenn.

1. Gagnkvæmt afnám vegabréfa: Danmörk, Finnland, Noregur, Svíþjóð.
2. Gagnkvæmt afnám vegabréfsáritana miðað við 2—3 mánaða dvöl: Austurríki, Barbados, Belgía, Brasilía, Bretland (þ. á m. eftirtaldar brezkur nýlendur og land-svæði: Hong Kong, Bahama-eyjar, Bermúða-eyjar, Turks- og Caicos-eyjar, Cayman-eyjar, Leeward-eyjar (Antigua, St. Kitts-Nevis, Anguilla, Montserrat og Virgin-eyjar), Windward-eyjar (Dominica, Grenada, St. Lucia og St. Vincent-eyjar), Brezka Hondúras, St. Helena, Falklandseyjar, Vestur-Kyrrahafseyjar (Gilbert- og Ellice-eyjar og Brezku Soloman-eyjar), Brunei, Seychelles-eyjar, Gibraltar og New Hebrides), Búlgaría, Chile, Fíji, Frakkland, Gambía, Grikkland, Guyana, Holland, Írland, Ísrael, Ítalía, Jamaica, Japan, Júgóslavía, Kanada, Kórea, Kýpur, Lesótó, Lúxemborg, Malasía, Malavi, Malta, Marokkó, Míritius, Mónakó, Portúgal, Rúmenía, San Marínó, Singapore, Spánn, Svasíland, Sviss, Tanzanía, Trinidad og Tobago, Túnis, Tyrkland, Sambandslýðveldið Þýzkaland.
3. Gagnkvæmur samningur um afnám vegabréfsáritana var gerður við Mexíkó 21.12.1965. Þess ber þó vel að gæta, að mexikönsk stjórnvöld krefjast þess, að Íslendingar afli sér ferðamannaskilríkja hjá mexikönsku sendiráði eða ræðis-skrifstofu fyrir komu sína til Mexíkó.
4. Samkomulag um vegabréfsáritanir var gert við Ástralíu 29.4.1969. Aðalefni þessa samkomulags er, að íslenzkir ríkisborgarar með gild íslenzk vegabréf, sem óska eftir að fara til Ástralíu, hvort sem er til tímabundinnar eða varanlegrar dvalar, skuli, þegar þeim hefur verið veitt heimild til að komast inn í landið, fá ókeypis vegabréfsáritun hjá þeim stjórnvöldum, sem eru bær að veita vegabréfsáritanir. Slíkar áritanir í vegabréf íslenzkra ríkisborgara, sem ferðast til Ástralíu í öðrum tilgangi en þeim að setjast þar að, verða gefnar út til 12 mánaða og gilda fyrir ótiltekinn fjölda ferða innan þeirra tímamarka.
Ástralskir ríkisborgarar með gild áströlsk vegabréf eru undanþegnir þeirri skyldu að fá áritun í vegabréf sín til allt að 3 mánaða dvalar á Íslandi, enda sé það ekki tilgangur þeirra að setjast þar að.
5. Samkvæmt auglýsingu frá 14.3.1962 eru bandarískir ríkisborgarar undanþegnir þeirri skyldu að fá áritun á vegabréf sín. Undanþágan gildir eingöngu um ferðamenn og veitir rétt til allt að þriggja mánaða dvalar hverju sinni, en veitir hins vegar ekki rétt til að stunda atvinnu á Íslandi.
6. Samkvæmt auglýsingu frá 9.2.1961 viðurkennir Ísland þar greind brezk ferðamannaskilríki til allt að 3 mánaða dvalar á Íslandi.
7. Samkvæmt auglýsingu frá 26.2.1971 eru borgarar Páfaríkis, sem eru handhafar vegabréfa, útgefinna af Páfaríkinu, undanþegnir þeirri skyldu að fá áritun í vegabréf sín.
8. Samkvæmt auglýsingu frá 26.2.1971 eru starfsmenn Sameinuðu þjóðanna, sérstofnana Sameinuðu þjóðanna og Alþjóðakjarnorkumálastofnunarinnar, er ferðast til Íslands og eru handhafar ferðabréfa (laissez-passer) S.þ. undanþegnir þeirri skyldu að fá áritun í vegabréf sín, þegar þeir eru á ferðalögum í þágu framangreindra stofnana, enda framvísi þeir jafnframt ferðabréfi yfirlýsingu Sameinuðu þjóðanna eða þeirrar stofnunar, sem þeir starfa hjá, um það, að þeir séu að reka erindi Sameinuðu þjóðanna eða viðkomandi stofnunar.

9. Ísland er aðili að samningi Evrópuríkja um afnám veðabréfsáritana fyrir flóttamenn, en 13 aðildarríki Evrópuráðsins hafa nú fullgilt þann samning.
10. Ísland er aðili að Evrópusamningi um ferðalög æskufólks á sameiginlegu vegabréfi.

Auglýsing þessi kemur í stað auglýsingar nr. 2 15. janúar 1970 um lönd, sem gert hafa samninga við Ísland um gagnkvæmt afnám vegabréfsáritana fyrir ferðamenn.

Þetta er hér með gert almenningi kunnugt.

Utanríkisráðuneytið, Reykjavík, 29. desember 1972.

Einar Ágústsson.

Pétur Thorsteinsson.

AUGLÝSING

**um samning milli Íslands, Danmerkur, Finnlands, Noregs og Svíþjóðar
um aðstoð í skattamálum.**

Hinn 9. nóvember 1972 var undirritaður í Stokkhólmi samningur milli Íslands, Danmerkur, Finnlands, Noregs og Svíþjóðar um aðstoð í skattamálum. Forseti Íslands undirritaði fullgildingarskjal varðandi samninginn hinn 28. desember 1972. Samningurinn er birtur sem fylgiskjal með auglýsingu þessari.

Þetta er hér með gert almenningi kunnugt.

Utanríkisráðuneytið, Reykjavík, 29. desember 1972.

Einar Ágústsson.

Pétur Thorsteinsson.